



## Inatsisartuni Ilaasortaq Doris Jakobsen SIUMUT

**Saviminilerinermik Ilinniarfiup matuneqarnissaa pillugu § 37 naapertorlugu apeq-qummut akissut**

Asasara Inatsisartuni Ilaasortaq, Doris Jakobsen, SIUMUT

Saviminilerinermik Ilinniarfiup matuneqarnissaa pillugu apeqqutinnut Naalak-kersuisut qujapput; apeqqutitillu Naalakkersuisut sinnerlugit tullinnguuttuni a-kissuteqarfigissavakka:

**Naalakkersuisunut apeqqut:**

**Nuummi Saviminilerinermik Ilinniarfiup matunissaa anguniarlugu Naalak-kersuisunit suliniutigineqartoq tusakkat ilumoorsimappata, apeqqutit ukua akineqarnissaat kissaatigaakka.**

Aallaqqaasiutigalugu Naalakkersuisut erseqqissaatigissavaat Nuummi Savimini-lerinermik Ilinniarfik matuniarneqanngimmat atuarfillu Sisimiunut nuuneqaler-saangimmat.

Naalakkersuisut atuarfiit aqutsisui piumaffigisimavai atuarfiit Sisimiunut inissil-lugu kattunneqarsinnaaneritut tunngatillugu pitsaaqutit ajoqutaasinnaasullu nali-lersoqqullugit. Tamatumunnga tunngaviuvoq atuarfiit illoqarfinni pineqartuni inissisimanerini eqqarsaatigalugit akunnaatsumik aaqqiissuteqarsinnaanissaq Naalakkersuisut kissaatigimassuk.

Misissueqqissaarnissaq pisariaqassagaluarpat Naalakkersuisut suleqatigiissitamik pilersitsissapput, paasissutissanik pissarsinissaq siunertaralugu, paasissutissallu taakku ilinniarfiit marluusut ataatsimoortillugit sumut inissinneqarsinnaanissaa-nut kingusinnerusukkut inassuteqarsinnaanissami tunngavineqassapput.

- 1. Sooq J&M-imi siulersuisut immikkut ittumik ataatsimiisinneqarne-rat ullut marluinnaat sioqqullugit saqqummiunneqarpa?**

**1-imut akissut:**

Siulersuisut siulittaasua immikkut ittumik ataatsimiinnissaq taaneqartoq pillugu mail-ikkut ataatsimiigiasivoq 13. maj 2011, ataatsimiinnerlu ingerlanneqar-luni 18. maj 2011.

07. Jun 2011  
Sagsnr. 2011-044291  
Dok. Nr. 650170

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: [klln@nanoq.gl](mailto:klln@nanoq.gl)  
[www.nanoq.gl](http://www.nanoq.gl)

## **2. Sooq J&M-ip siulersuisui paasissutissanik isertuunneqarsimappat?**

### **2-mut akissut:**

Sanaartornermut Ilinniarfiup kiisalu Saviminilerinermut Ilinniarfiup siulersuisui suliaq pillugu siulittaasumit 13. maj 2011 paasitinneqarput. Taamaattumik siulersuisuni ilaasortat paasissutissanik isertuunneqarsimanngillat.

## **3. Matusinissamik aalajangiussineq qanga Naalackersuinikkut piva?**

### **3-mut akissut:**

Naalackersuisut 09. dec. 2010 aalajangerput, ilinniarfiit Sanaartornermut Ilinniarfik (B&A) aamma Saviminilerinermik Ilinniarfik (J&M) 1. januar 2011-imit atuarfimmuut ataatsimut kattutsinneqassasut sumiiffinni marlunni ilinniarfeqarlutik ataatsimullu allaffeqarfeqarlutik. Taamaattumik atuarfiup matuneqarnissaanik aalajangertoqarnikuungilaq.

## **4. Nuummi Saviminilerinermik Ilinniarfimmik matusinissaq sumik siunertaqarpa?**

### **4-mut akissut:**

Oqaatigineqareersutut Saviminilerinermut Ilinniarfiup matuneqarnissaa siunertarineqanngilaq, takuuk aallaqqaasiut.

## **5. Ilinniartitsisunik Nuummiittunik soraarsitsisoqassava?**

### **5-imut akissut:**

Naamik, ilinniartitsisut tamarmik atorfeqartinneqaannassapput, uaniami taamaallaat pineqarmat allaffissornikkut allanngortiterineq. Forstanderitulli atorfik atorrunnaarsinneqarpoq ilinniartitaanermullu pisortamik taarserneqarluni.

## **6. Ilinniartut ilinniartitsisullu Sisimiunut nuutsinneqarnissaat qanoq pilersaaruteqarfigi-neqarpa?**

### **6-imut akissut:**

Ilinniartunik ilinniartitsisunillu Sisimiunut nuutitsinissaq pilersaarutigineqanngilaq, takujuk aallaqqaasiut.

**7. Nuummiik Sisimiunut nuussisoqassapat, ilinniartitsisut Nuummiik Sisimiunut nuuttussat inissaat piareersimappat?**

**8. Sisimiunut nuussisoqassapat ilinniartunut kollegiat naammappat?**

**7 + 8-mut akissut:**

Oqaatigineqareersutut Saviminilerinermut Ilinniarfiup Sisimiunut nuunneqarnissaa pilersaarutigineqanngilaq. Siunissami atuarfik Sisimiunut nuunneqartariaqalissagaluarpat, nuussineq pitinnagu ajornartorsiutaajunnartut Naalakkersuisunit qulaajarneqaqqaassapput.

**9. Jern & Metal Skole Sisimiunut nuussappat, maanna illorsuit ilinniartittut atortut sumut atorneqarneqassapat?**

**A. Aamma kollegiat inueruttussat qanoq pilersaaruteqarfigineqarpat?**

**9-mut akissut:**

Siuliani nassuiaatigineqartut aallaavigalugit apeqqutigineqartunut tunngatillugu Naalakkersuisut takorluugaqanngillat.

**10. Nuussinissamut tunngatillugu Jern & Metal Skole-mi ilinniartitsisut, ilinniartut, siulersuisut aammalu Sanaartornermik Ilinniarfik qanoq peqataatinneqartigippat?**

**a. Nuussinissamut tunngatillugu tusarniaasoqarnikuua?**

**10-mut akissut:**

Atuarfiit inissisimanerat eqqarsaatigalugu akunnaannerusumik aaqqiissuteqarsinnaanissaq siunertaralugu tamatuma nalilersornissaanut Naalakkersuisut kisaataanut atatillugu tamatuma pitsaaqutaasa ajoqutaasalu nalilersornissaanut Siulersuisut akuutinneqarput, taamatullu iliorneq nalilersuinerinnaammat tusarniaanissaq pisariaqarsimannigilaq.

**11. Sooq Inatsisartuni Ilinniartitaanermut Ataatsimiititaliaq malinnaatinneqanngila?**

**11-mut akissut:**

Siuliani akissutigineqartuni atuarneqarsinnaasutut Inatsisartut Ilinniartitaanermut Ataatsimiititaliaata akulerutsittariaqarneranik tunngaviliisinnaasunik Naalakkersuisut iliuuseqarsimanngillat.

Inussiarnersumik inuulluaqqusilluta  
Med venlig hilsen



Palle Christiansen  
Ilinniartitaanermut Iisimatusarnermullu Naalakkersuisoq